

Qalam

Bilangan 55 - Jamadil Akhir 1374 - Februari 1955- 60 sen

Penerangan Agama Yang Dikehendaki

Di dalam penghujung bulan yang lalu orang Islam di Singapura telah berasa bersyukur mendapat peluang atas lawatan Kiyai Haji Anwar Musaddad mahaguru di dalam Universiti Islam Indonesia dan Perguruan Tinggi Islam Negeri (kedua-duanya di Jogjakarta) yang telah memberi ceramahnya (syarahannya) tentang agama Islam dengan suatu cara yang menarik, memberi tamsil-tamsil yang dibuat dengan gambaran dan dengan menggunakan "sala' iyyah projektor" iaitu dengan alat-alat moden bagi memudahkan pengertian seseorang dalam masalah-masalah yang dikupasnya.

Adalah diakui bagi orang-orang Islam di sini bahawa ceramah agama dengan menggunakan cara sedemikian itu adalah pertama dilihat oleh orang-orang kita dan kerana itu ceramah beliau telah mendapat sepenuh-penuh perhatian kerana pendengar-pendengarnya merasa bahawa ceramah itu sebenarnya memberi kesan dan peringatan yang kuat dan tepat supaya kita menjauhkan diri daripada keruntuhan akhlak dan menjauhkan diri daripada melakukan perbuatan-perbuatan yang mungkar serta patuh kepada hukum-hukum Allah dan mengesa serta mengakui akan kebesaran-Nya.

Kedatangan beliau dengan membawa petunjuk yang serupa itu patutlah diperhati dengan saksama oleh mudifnya yakni Jam' iyyah al-Da'wah al-Islāmiyyah untuk mengumpulkan segala tenaga dan usaha menjalankan Da'wah al-Islāmiyyah di dalam lingkungan kita dengan cara-cara yang sesuai supaya menepati nama dan perbuatan kerana kiyai itu sendiri telah membayangkan bahawa

kehidupan umat Islam seperti di Singapura ini adalah menghadapi percampuran *international* yang tak dapat kita jauhkan diri daripada mudah terpengaruh oleh segala sesuatu anasir yang dengannya menghendaki kita selalu ingat mengingati di antara satu dengan lain.

Selain daripada itu beliau menganjurkan pula supaya ditubuhkan sebuah pertubuhan yang berusaha untuk menyatukan pelajaran-pelajaran agama di sekolah-sekolah agama supaya dengannya pelajaran-pelajaran agama itu dapat dibentuk persamaannya dan diisikan di dalamnya ilmu-ilmu agama serta pengajaran-pengajaran am yang mengenai keduniaan kerana hidup agama itu tidak hanya semata-mata untuk akhirat tetapi juga diusahakan untuk mengerjakan keduniaan sebagai bekal di akhirat kelak.

Syor ini adalah suatu syor yang sangat baik dan ia adalah seperkara yang patut mendapat perhatian yang besar daripada ketua-ketua Islam di sini kerana dengan adanya syor-syor itu, jika sekolah-sekolah agama kita telah dapat disatukan, maka mudahlah rasanya kita menyusun bersama-sama di dalamnya untuk mengadakan pelajaran am dengan menggunakan bahasa Inggeris yang sangat-sangat berguna untuk sara hidup yang dalamnya dapat pula kita satu peluang yang besar untuk mendapat bantuan daripada kerajaan-kerana dengan adanya pelajaran am berbahasa Inggeris itu adalah meluluskan bagi sekolah-sekolah agama itu untuk mendapat bantuan-bantuan yang telah pun diisytiharkan oleh kerajaan.

Sebenarnya peluang ini tidaklah sayogia dicuaikan dengan begitu sahaja-dan ini tidak akan didapat selagi guru-guru agama dan nazir-nazir sekolah-sekolah itu tidak mahu bersatu padu untuk mendapat peluang ini yang dengannya bermakna kepayahan hidup mereka untuk menyelenggarakan pelajaran agama akan dapat sedikit bantuan yang boleh didapati oleh semua orang yang berhak di dalam negeri ini.

* * *